

EDITORIAL

Iduso ang pagpasabat sa mga Duterte kag pagbato sa kontra-pumuluyo nga rehimen Marcos

Supak sa ginapangayo nga katarungan sang pumuluyong Pilipino, uyaya subong si Marcos sa pagduso sang impeachment ukon paghukom sa Kongreso kay Vice President Sara Duterte, kag sa pagpa-aresto kay anay Presidente Rodrigo Duterte para mag-atubang sa International Criminal Court. Ini sa pihak nga nagasinggitan na ang mga ebidensya sang malala nga korapsyon ni Sara, kag mga krimen batuk sa katawhan ni Rodrigo.

Ginasunod ni Marcos ang panugyan sang amo nga imperyalistang US nga tapuson ang pakigbanggi niya sa mga Duterte agud indi magkahangawa ang mga dumuluong nga monopolyo kapitalista nga magpangapital sa pungsod. Sa baylo nga pamati-an ang singgit sang katawhan para sa katarungan, ginauna ni Marcos ang konsolidasyon sang iya nga poder para amat-amat nga kuhaan ang mga Duterte sang gahum kag impluwensya. Kabahin sang mga tikang nga ini ang ginahimo nga "loyalty check" kag pagbalasa sang mga upisyal sang AFP kag PNP kag reorganisasyon sang National Security Council.

Pinaka-katuyuan ni Marcos ang mas pahugton ang kontrol sa gahum pampulitika para pangapinan ang kaugalingon nga burukrata-kapitalista nga interes. Isa ka nagapanguna nga ginahatagan pagtamod subong ni Marcos amo ang palaabuton nga eleksyon sa Mayo. Ginagamit niya ang bug-os nga kusog sang estado kag pampubliko nga pondo agud siguraduhon nga makontrol sang iya mga alipures ang Senado, Kongreso kag mga lokal nga gubyerno. Ang konsolidasyon sang poder ni Marcos ang ginagamit niya batuk sa pumuluyo kag batuk sa mga karibal niya sa pulitika.

Sa tuyo nga lumsan ang singgit

sang katawhan para sa katarungan kag pahugon ang mga kongresista kag grupo nga nagaduso sang impeachment, nag-gasto ang mga maki-Duterte nga lider sang Iglesia ni Cristo sang ginatos ka milyon piso para tipunon ang minilyon ka katapo sini sa mga rali sadtong nagligad nga semana. Gingamit ang mapaniplang nga tema nga "paghiliugyon kag kalinong" agud tabunan ang ginapangayo sang pumuluyo nga katarungan kag singgit para pasabton ang ginakaugtan nila nga magamay nga Duterte.

Masobra isa ka bulan na ang nagligad sang asud-asod nga ginpasaka ang tatlo ka kaso

sang *impeachment* sa Kongreso. Apang sa kumpas ni Marcos, nga naghambal nga ang impeachment ang "pag-usik sang panahon" kag "wala pa sa husto nga ti-on," wala pa sang bisan isa sa tatlo nga ini ang nasuguran iproseso. Ginapagwa sang iban nga ginahulat ni Marcos nga masigurado nga uyat niya ang mayorya sa Senado agud sigurado nga mahukman si Sara Duterte. Ang matuod, nagapabungol-bungol si Marcos sa singgit sang katawhan kag ginapunggan kag ginabungkag ang inisyatiba sang nagkalain-lain nga demokratiko nga sektor nga pasabton si Sara Du-



terte kag amay nga si Rodrigo.

Ang pag-atrasar ni Marcos sa kaso sang pagpahalin kay Sara Duterte ang ilabi nga naga-gatong sa kaakig sang pumuluyong Pilipino. Indi nila mabatas nga makita nga padayon nga nagaluntad ang bise presidente nga utok sa maanomalya nga pag-gasto sa ginatos ka milyon piso nga kwarta sang banwa. Kag ilabi nga indi nila mabatas nga ang binilyon piso nga badyet sang reaksyunaryo nga guberno nga naghalin sa ginabayaran nga buhis sang ordinaryo nga pumuluyo ang ginabulsa sang mga korap nga upisyal sang guberno, sa pagpanguna sang burukrata-kapitalista nga si Marcos.

Ilabi nga nagadalom ang kaakig sang pumuluyong Pilipino sa atubang sang nagalala nga nagalala nga krisis sa palangabuhian, ilabi na sa asud-asod nga pagsaka sang presyo sang pagkaon, lana kag nagkalain-lain nga balaklon sa una nga semana sang 2025. Padayon nga nagapabungol-bungol si Marcos sa singgit sang mga mamumugon kag ordinaryo nga empleyado nga pataason ang suhol kag sweldo, nga tuman ka kulang para mabuhi sang disente ang mga pamilyang Pilipino.

Wala sang solusyon ang rehimen Marcos sa naga-grabe nga problema

sang malaparan nga disempleyo, kag ginapabay-an na lang ang mga tawo nga mansig-mansig mangita sang ila palangitan-an. Mas malala pa, ginadingutan ang minilyon ka mangunguma, mangingisda, mga drayber sang dyip kag iban pa nga sektor sa atubang sang mga burges-kumprador kag kasabwat nga dumuluong nga mga kumpanya kag bangko nga agawon ang ila duta kag palangabuhian.

Sa atubang sang malapad nga pag-antus kag kapigaduhon sa palangabuhian sang katawhan, nagabaskog nga pagpanumpo ang sabat sang rehimen Marcos sa tuyo nga tabunan ang ila mga hibubun-ot. Padayon nga nagadamo ang kaso sang sarbeylans, pagpang-ipit sa mga organisasyon, pagpasaka sang mga himu-himo nga kaso, pag-aresto, tortyur kag ekstrahudisyal nga pagpamatay batuk sa ordinaryo nga pumuluyo nga naga-isa para ipakigbato ang ila nga interes kag kaayuhan. Todo-todo ang paggamit subong ni Marcos sa mga laye "kontra-terorismo" para sa pagpanumpo sa mga kinamatarung. Mas malala ang kahimtangan sa kabukiran kung sa diin direkta nga laye militar ang ginapatuman sa linibo ka mga barangay nga ginakontrol kag ginaharian sang mga pasista nga suldado.

Agud isulong ang kaayuhan kag

kinamatarung sang masa sang pumuluyong Pilipino, dapat maukod nga bugkuson ang ila kubay kag hatagan sang gamhanan nga porma ang ila kaakig sa mga krimen kag kasal-anan sang mga Duterte, kag sa nagapadayon nga burukrata-kapitalista kag pasista nga paghari sa idalom ni Marcos. Ilabi nga pabaskugon ang malapad nga nagahiliugyon nga prente para tipunon ang tanan nga sektor, organisasyon kag mga indibidwal sa panawagan nga pasabton ang mga Duterte. Dapat tukuron ang nagkalain-lain nga porma sang kahugpongan kag mga alyansa, pormal man ukon indi pormal, agud mabuyok ang pinakamalapad nga masa nga makigbahin sa nagkalain-lain nga porma sang hublag kag pagpadayag sang hibubun-ot.

Kinahanglan makahulugan nga isulong ang demokratiko nga kahublagan masa para pasabton ang mga Duterte kag pabaskugon ang awayan sa pagpugong sa mga Marcos kag sa kabilugan nga burukrata-kapitalista nga sistema. Tuman ka paborable ang sitwasyon para pukawon ang masa kag madasig nga palaparon ang ila nga organisado nga kubay. Matambok ang duta agud madamuan nga patubuon ang mga unyon kag hugpong masa lunsay sa kasyudaran kag kabukiran.

Sakmiton ang tuman kahaum nga sitwasyon agud isulong ang pang-ekonomya kag pampulitika nga mga awayan sang masa kag mag-angkon sang mga kadalag-an sa ila mga paghimakas. Dapat iangot ang mga ini sa pagbato sa rehimen US-Marcos kag sa pagsulong sang pungsodnon-demokratiko nga kahublagan.

Dapat mapagsik nga maghulag kag ilabi nga magpakabakod ang mga kadre kag katapo sang Partido agud magserbe nga ubod sa mga pagbato sang masa. Sila ang iwag kag giya sa pagsulong sang masa sa mabudlay nga banas sang paghimakas. Dapat tukuron ang mga likom nga organisasyon masa nga direkta nagasuporta sa pagsulong sang armado nga paghimakas, kag nagapukaw sa masa nga magpatapo sa Bagong Hukbong Bayan.



Tuig LVI No. 2 | Enero 21, 2025

Ang Ang Bayan ginabantala sa lenggwahe nga Pilipino, Bisaya, Iloko, Hiligaynon, Waray, Ingles kag Espanyol. Nagabaton ang Ang Bayan sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Kaundan

Editorial: Iduso ang pagpasabat sa mga Duterte kag pagbato sa kontra-pumuluyo nga rehimen Marcos 1

Rebolusyonaryong patakaran sa eleksyon 3

Kahublagan panadlong sa komiteng panrehiyon 4

Pagpang-ipit sa mga kandidato sang Makabayan Ulos 2024, ginbalhag sang Armas 5

Ika-56 nga anibersaryo sang PKP, ginsaulog Hampak sang mataas nga presyo sang bugas 6

Sa malip-ot nga pulong 7

Hungod nga ginpatay sa isla sang Negros 8

Mga protesta 8

Trump, pamahog sa katawhan 9

Ceasefire sa tunga sang Palestine kag Israel 10

Ang Ang Bayan ginabantala duha ka beses kada bulan sang Komite Sentral sang Partido Komunista ng Plipinas

 ang.bayan@cpp.ph

Rebolusyonaryong patakaran sa panahon sang reaksyunaryong eleksyon

U pisyal na nga nagsugod ang panahon sang reaksyunaryo nga eleksyon sa pungsod sadtong Enero 12. Magapa-indisanay kag magdinaguso diri ang mga kandidato para makuha ang indi magnubo sa 18,000 pusisyon sa gubyrno kag panginpuslan ang burukrata-kapitalista nga sistema. Magabungguanay diri ang dalagko nga warlord kag mga dinastiya sa pulitika kag dululungan nila nga pagalapakan ang kaayuhan sang pumuluyo. Gamit nila ang ila mga armado nga maton, pulis kag pwersa militar.

Sa atubang sini, hugot nga ipatuman sang rebolusyonaryong kahublagan ang nagaluntad nga mga patakaran sa panahon sang reaksyunaryo nga eleksyon sa sakop nga erya sang operasyon. Sa mando sang Partido, pagasiguruhon sang Bagong Hukbong Bayan (BHB) ang pagpangapin sa kaayuhan, mga kinamatarung kag interes sang pumuluyo.

Nagakadapat nga ipahanumdom sa tanan nga mga nagalagas sang pwesto sa reaksyunaryo nga gubyrno nga ang mga patakaran ang hugot nga ipatuman sa mga rebolusyonaryong erya. Ang mga kandidato kag ila mga tigsuporta ang pagatugutan nga mangampanya sandig sa mga nagaluntad nga pagsulundan.

Ginadumilian ang mga pulitiko nga magdala sang mga armado nga maton kag mga eskort nga pulis kag militar nga masami ginagamit para pahugon ang pumuluyo. Ang iban pa nga porma sang pagpamilit, paggamit

sang armadong kapintas ang indi pagpalampuwason, ilabi na sang mga burukrata-kapitalista nga nagagamit sa pondo sang banwa batuk sa pumuluyo. Pagatumanon sang BHB nga kuhaon ang mga armas sang mga kandidato kag ila mga armadong hurong. Kung kinahanglanon, igapatuman ini paagi sa mga tsekpoynt kag iban pa.

Dapat nga targeton sang BHB ang mga yunit sang AFP kag PNP, pati man ang mga armadong hurong sang mga reaksyunaryo nga pulitiko, nga pagagamiton ang kampanya sa eleksyon sa mga larangan gerilya isip pantabon sa mga operasyon panilag batuk sa Partido, sa BHB, sa demokratikong gubyrno sang banwa kag sa rebolusyonaryong masa.

Bag-o mangampanya sa mga rebolusyonaryong erya, kinahanglan nga magpahibalo ang mga pulitiko kag makig-angot sa mga lokal nga yunit sang BHB. Bilidhon ang koordinasyon nga ini agud malikawan ang

ano man nga insidente, kabahin ang mga komprontasyon sa tunga sang mga armado nga hurong sang magkasumpong nga pulitiko.

Sigurado nga pagagamiton sang AFP ang reaksyunaryo nga eleksyon para pabaskugon ang mga operasyon kombat sini, pampulitika nga pagpanumpo kag pagkontrol sa mga barangay sa kabukiran sa balayon sang gyera kontra-insurhensya. Sa pihak nga bahin, pagaluboson man sini ang AFP kag PNP nga obligado nga ibutang sa nagkalain-lain nga banwa nga pagatumuron nga "red, orange kag yellow-risk" sandig sa kabaskugon sang banggianay sang mga lokal nga pulitiko, pati na "presensya" sang BHB. Ang mga yunit pangkombat sang AFP ang lehitimo nga target sang BHB.

Hugot nga gina-engganyo sang Partido ang mga kandidato nga likawan ang mga tanyag sang armado nga seguridad halin sa AFP, tungod ini ang ginagamit lang sang militar agud ilunsar ang pampulitika nga pagpanumpo. Masami, ang mga burukrata nga ginapaboran sang militar ang sila man nagapakigsabwatan sa pasista nga kampanya sang pagpanumpo sa kabukiran. Pinakakatuyuan sang ila nga mga operasyon nga sumpuon ang pagbato sang pumuluyo kag protektahan ang interes sang mga dalagko nga agalon mayduta, dalagko nga negosyo kag mga dumuluong nga kumpanya sa pagmina kag plantasyon.

Sa pihak sang pasulit-sulit nga pagdeklarar nga isa na lang ang "hugyang nga larangan gerilya" sang BHB, ginpahayag sang Philippine Army nga sila ang "nagapabilin nga alerto kag padayon nga magalunsar sang mga operasyon para sa internal nga seguridad" agud masiguro ang "kalinong kag kasulhay" sang piniliay. Ang mga operasyon nga ini ang nagatib-ong sang mga taktika sang "guns, goons and gold" nga kinaiya sang tanan nga mga reaksyunaryong eleksyon.



Determinasyon sang mga komite panrehiyon nga magsulong sa banas sang kahublagan panadlong

Maathag ang sabat sang nagkalain-lain nga komite panrehiyon sang Partido Komunista ng Pilipinas (PKP) sa nagkalain-lain nga bahin sang pungsod sa kahublagan panadlong nga ginapanawagan sang Komite Sentral. Ginpahayag sang mga nagapamuno nga komite ang ila pagpanginbabaw kag padayon nga pagpaninguha nga tadlungon ang mga nangin kahuyangan kag pagsayop sa nagligad nga mga tinuig agud makahulugang nga maka-abante sa nagkalain-lain nga patag sang hilikuton sa tagsa nila ka sakop nga erya sang operasyon.



Mga kadalag-an sa Southern Tagalog

"Dapat ikalipay ang mga kadalagan sang subong nga kahublagan panadlong sa rehiyon," pahayag sang komite sa Southern Tagalog nga ginpagwa sang tiglikom sini. Ginbahin sang komite nga ginpabakod, gin-uyatan kag ginhatagan katumanan sang Partido sa rehiyon ang mga katungdanan sa kahublagan panadlong. Kabahin diri ang pagpatapos sang kampanya sa pagtuon sa mga pagtulun-an pampartido sa halos lima ka libo nga katapo sang Partido sa kabukiran kag kasyudaran.

Suno diri, kalabanan sang mga komite sang Partido ang madinalag-on nga nakalunsar sang tagsa nila ka komprehensibo nga pagsumada sa ila nga praktika sa nagligad nga lima ka tuig. "Ang mga pagsumada nga ini ang ilabi pa nagpadalom sa mga nauna na nga natumod nga mga hambalanon sa mga ginpabakod nga pagsumada sa lebel sang komite sa rehiyon," pahayag sang Tiglikom.

Nakabulig man ang mga pagsumada para labaw pa nga patalumon ang mga natukib kag natumod nga pagsayop kag kahuyangan sa mga subrehiyon/prubinsya kag mga larangan isip mga partikular nga porma sang empirismo halin 2019 tubtob 2022. Dugang sang tiglikom, "Gintumod ang hapaw, pang-gwa kag maka-isa ka habig nga pagtumod sa kahimtangan kag mga butang, pagsayop sa istrategikong paglantaw sa mga butang kabangda-

nan agud mangin hupas ang uyat nga kinaalam kag wala nagahaum sa obhetibo nga kahimtangan kag sa amo [nakaapekto sa] nadihon nga mga plano kag patakaran."

Ginpahayag sang Tiglikom nga "determinado ini nga ilabi pa nga padalumon kag palaparon kag dalhon tubtob sa kadalag-an ang subong nga kahublagan panadlong." Amo man, matinud-anon man nga ginpahayag sini nga samtang may dalagko nga pagsulong wala pa sang makahulugang nga pagtiyog sa pagpugong sa mga kahalitan kag pag-atras sang mga rebolusyonaryong hilikuton kag pwersa sa kabukiran kag kasyudaran sang rehiyon samtang may bahin pa nga nagapadayon sa pag-atras.

Pagpanginbabaw sa Negros Island

Padayon nga ginapabakod sang Komiteng Rehiyon sa Negros Island ang panawagan sang Komite Sentral para sa kahublagan panadlong. Sa nagligad nga tuig, ginreport sini ang pagbalik-tuon sang Partido kag mga katapo sa nauna na sini nga nadihon nga 22 ka tuig nga sumada sang rebolusyonaryong paghimakas sa isla halin sa tunga-tunga nga bahin sang dekada 1990. Ginbahin nila nga ini ang gintungungan sang Komite para sa 5-tuig nga pagsumada para sa 2017-2022.

"Nakatipon kita sang bulawanon nga mga leksyon isip mabakod nga basehan sa pangkabilugan nga plano kag direksyon nga labaw pa makapabaskog sa pundasyon sang aton Partido," pa-

hayag sang Komite angot sa pagsumada. Gintumod sini ang positibo nga inagihan sang kolektibo nga pagsumada sang mga hilikuton sang tagsa ka komite tubtob sa lebel sang larangan gerilya.

Ginsulong sang Komite ang kampanya nga pagtuon sa mga dokumento nga ginpagwa sang Komite Sentral nga dapat padayon nga tun-an. Kabahin diri ang tatlo-lebel nga kurso sang Partido nga ginlunsar sa nagkalain-lain nga organo kag masang katapuan sandig sa nangin plano sa edukasyon sang rehiyon. Nagtuhaw sa kubay nila ang bag-o nga mga instruktur kag mga bag-ong katapuan sang Partido.

Pagbahin pa nila, samtang ginatun-an ang teoritikal nga mga sinulat nga ini, praktikal nga nakabulig sa rehiyon ang kolektibo nga pagtuon sa Rebolusyon, ang teoritikal nga dyornal sang Partido, kag mga memorandum halin sa Komite Sentral para panginbabawan ang mga sayop nga gawi kag ideya. Dako ini ang nabulig sang paglubad sang mga dokumento, kurso kag balasahon padulong sa lenggwahe nga Hiligaynon para sa mas madali nga paghangop sang mga katapo, ilabi na ang mga naghalin sa sandigan nga sahi.

Sa atubang sang mga focused military operations (FMO) sang rehimen US-Marcos, nakapanginbabaw ang Partido kag hukbo sang banwa sa rehiyon sa bulig sang kahublagan panadlong. Nahimo sini nga pasangkaron ang

"Determinasyon sang..." sundan sa pahina 5

**Pagpang-ipit sa mga
kandidato sang Koalisyon nga
Makabayan, nagabaskog**

SA NAGAHILAPIT NGA mid-term nga eleksyon, nagabaskog ang atake kag pagpang-ipit sang rehimen Marcos kag armado nga pwersa sini batuk sa mga kandidato kag partido sa idalom sang Koalisyon nga Makabayan.

Sadtong Enero 15, nag-atubang sa Office of the City Prosecutor of Manila ang mga kandidato pagkase-nador sang Makabayan para magpa-saka sang kontra-salaysay sa kaso nga iligal nga asembleya ukon pagla-pas sa Public Assembly Act ukon Ba-tas Pambansa 880 nga ginpasaka sa ila sang mga pulis. Kaangot ini sang hublag protesta sadtong Nobyembre 30, 2024, Adlaw ni Bonifacio, sa Men-diola sa Manila.

Napulo sa 11 ka kandidato sang koalisyon ang gindalahig sa kaso upod ang nominado sang Bayan Muna Party-list, mga lider sang Alliance of Concerned Teachers kag Alliance of Health Workers. Matandaan nga nau-na na nga ginkasohan sila KMU chair-person Elmer "Ka Bong" Labog kag Nilo Mortifero, katapo sang Bayan Muna nga iligal nga gin-aresto sang mga pulis sa adlaw sang protesta.

Sadtong Enero 10, nagpagwa sang memorandum ang Bureau of Jail Management and Penology (BJMP) nga nagmando nga "hugot nga banta-yan" ang mga bilanggo nga ginaduda-han nga may kaangtanan sa Partido Komunista ng Pilipinas (PKP) ukon mga alyado sini. Gintumod man sa ka-suguan nga dapat bantayan ang kan-didato pagkassenador nga si ACT Teacher's Rep. France Castro tungod sa masako niya nga pagbisita sa bi-langguan. Ginapagwa nga ginasugo niya kuno ang mga bilanggong pulitikal nga magtipon sang pondo halin sa mga "drug trafficker" sa prisohan. Naga-damo man ang nagakabaton ni Castro nga pamahog sa iya nga kabuhi.

Samtang, halos adlaw-adlaw ang pagpagwa sang National Task Force-Elcac sang mga pahayag sang Red-tagging kag pagpalapta sang kabuti-gan batuk sa Makabayan, mga partido kag kandidato sini.

Ulos 2024, ginbalhag sang Armas

GINPAGWA SANG Artista at Manunulat ng Sambayanan (Armas) ang Ulos, pangkultura nga dyornal, para sa 2024 sadtong Enero 13, adlaw sang ika-38 anibersaryo sang grupo. Ang isyu sang Ulos ang nagtiyog sa tema sang padayon nga pagsulong sang pungsodnon-demokratiko nga rebolusyon kag pagpangin-babaw sang Partido, hukbo kag rebolusyonaryong masa sa balayon sang kahub-lagan panadlong.

Kaundan sang isyu ang mga sanaysay, binalaybay, estorya, kanta, drowing kag iban pa nga obra-sining nga nagalaragway sa mga sakripisyo kag kasakit sa kabuhi-kag-kamatayon nga pagbato sang mga rebolusyonaryo. Ginalaragway sa mga pyesa sini ang salsalon nga paghiliugyon sang mga rebolusyonaryong pwersa sa masa kag ang maukod nga hilikuton masa para balikan ang nabilin kag magbangon.

Ang isyu sang Ulos 2024 ang may yara sang 150 panid nga nagaunod sang sinulatan nga nabalhag sa Pilipino, English, Iloko, Bisaya kag Hiligaynon.

Mahimo makakuha sang kopya sang Ulos 2024 sa *philippinerevolution.nu* ukon mangayo sang kopya sa *e-mail* nga *ulos@ndfp.org*. Magbantay lang sa bag-o nga anunsyo sang Armas kag Ulos para sa pagpangalap sang mga kontri-busyon sa masunod nga edisyon sini subong nga tuig.

**Ika-56 nga anibersaryo sang PKP, ginsaulog
sa South Quezon Bondoc Peninsula**

SIMPLE, PERO MAHINUNG DANON ang pagsaulog sang Bagong Hukbong Bayan (BHB)-Quezon (Apolonio Mendoza Command) sa ika-56 anibersaryo sang Parti-do Komunista ng Pilipinas. Ginlunsar nila ang estilo nga kapehan nga pagdum-dom sa isa ka larangan sa South Quezon- Bondoc Peninsula (SQBP).

Sa programa, ginpasidunggan sang yunit ang mga martir sang Quezon sa nagligad nga tuig. Nagahatag sang pahayag sang pagpakig-ugyon ang mga bisita nga nagtambong nga naghalin sa mga alyado nga hugpong sang National De-mocratic Front of the Philippines (NDFP) kasubong sang Kabataang Makabayan kag Artista at Manunulat ng Sambayanan.

Bag-o pa ang Kapehan nagbasa kag nagtuon ang Pulang hukbo sang paha-yag sang Komite Sentral kag mensahe sang Tiglikom sang Komiteng Tigpatuman sang Komiteng Rehiyon sang Partido sa Southern Tagalog sa anibersaryo sang Partido. Ginpabakod sang mga pahayag kag mensahe ang panawagan nga "Ma-nadlong kag Sumulong!" nga amo man ang tema sang Kapehan.

Parte man sang kahiwatan ang sinaluhay sa gamay nga ginhanda nga pag-kaon, pagbahinay sang inagihan sa nagligad nga tuig, pagburda, pagdrowing, kantahan kag pagbasa sang pila ka libro nga Marxista-Leninista-Maoista.

"Determinasyon sang..." halin sa pahina 4

ginahulagan nga erya sang lima ka larangan gerilya sa isla kung ikumpara sa nagligad nga tuig. "Sa tunga sang mga sakripisyo kag kabudlayan sa pagsulong sang armado nga rebolusyon, napunggan ang "trend" sang pag-atras. Sa baylo, nagdamo ang BHB subong nga tuig kumpara sa nagligad nga tuig," suno sa Ko-mite.

Nagtuhaw ang panibag-o nga kusog nga may kumpanya sa kubay sang mga Pulang hangaway tungod sa nalab-ot nga konsolidasyon kag mga paghanas sa pulitiko-militar. Indi magnubo sa 36 nga mga opensiba ang ginlunsar sang Pu-lang hukbo sa nagligad nga tuig. Nakumpiskar sini ang 17 ka armas, bala kag iban pa nga kagamitan militar nga maga-armas sa bag-o nga mga rekrut sang BHB. Nangin sabat ini sang BHB sa panawagan para sa hustisya sang tuman ka-damo nga biktima sang mga paglapas sa tawhanon nga kinamatarung sang mili-tar kag pulis.

AB

Hampak sang mataas nga presyo sang bugas kag iban nga balaklon sa pumuluyong Pilipino

Imbes nga bugas nga tag-₱20 kada kilo, kamatis nga tag-₱20 kada bilog ang nagsugata sa mga Pilipino pagsulod sang 2025. Bag-o matapos ang Enero, pagabatyagon man sang pumuluyo ang magalab-ot sa 10% nga pagtaas sa presyo sang 60 ka sandigan nga produkto, tubtob ₱2.70/litro liwat nga pagsumpit sang mga produktong petrolyo, kag patong nga ₱15 kada byahe sa LRT. Ang mga dugang palas-anon nga ini ang magadugang sa nauna na nga ginbalita nga dugang sukot sa kuryente kag tubig kag dugang buhin sa sweldo sang mga nagahulog sa SSS ukon Social Security System. (*Lantawon ang kaangot nga artikulo nga "Mala-kalamidad nga kahalitan ang dala sang rehimen US-Marcos," Ang Bayan, Enero 7, 2025*).

Indi lamang inutil, salabton mismo sang rehimen Marcos ang padayon nga pagtaas sang sukot kag presyo sang mga balaklon, ilabi na sang bugas, nga nagapasangyad sa kalidad sang kabuhi sang mga Pilipino. Imbes nga pabaskugon kag suportahan ang lokal nga produksyon sang bugas, ilabi sini nga ginabukas ang lokal nga merkado sa pagbaha sang mahal nga imported nga bugas. Palpak ang patakaran nga pagbuhin sang taripa sa imported nga bugas nga ginpatuman isip pabor sa dalagko nga importer kag ismagler sang bugas.

Gin-aku mismo sang mga upisyal sang Department of Agriculture sa mga pagtalakay sa Kongreso sadtong Disyembre 2024 kag sini nga Enero ang kainutil sang pagpanubo sang taripa para panubun ang presyo sang bugas. Suno sa ila, nagnubo ang "landed cost" sang imported nga bugas sang tubtob ₱8 pero nagapabilin nga lapaw sa ₱50 ang presyo sang ginapasulod nga bugas sa merkado. Lapnagon ang hoarding (pagtago sang suplay) para mababilin nga mataas ang presyo. Sadtong Disyembre 2024, ang abereyds nga presyo kada kilo sang *well-milled* nga bugas ang ₱54.97. Ini ang 23.3% ukon ₱10 mas mataas kaysa ₱44.54 kada kilo sadtong Disyembre 2023. Sa pihak nga bahin, nagnubo sang tubtob ₱10 ang baklanay sang lokal nga humay kada kilo sa pareho nga panahon.

Resulta sang wala pugong nga pagtaas sang presyo sang pagkaon kag iban

pa nga balaklon ang paghagmak sang matuod nga balor sang piso. Sadtong 2024, ang matuod nga balor sang isa ka gatos piso ang ₱79 na lang. Ang mabakal sadtong 2018 nga ₱100 ang magakinahanglan subong sang ₱121.

Sangkatlo sang ginagastuhan sang mga pamilyang Pilipino amo ang pagkaon. Tungod sini, mas mataas ang tantos sang implasyon sa pinakapigado nga pamilya. Ano man nga pagtaas sang presyo, ano man ini kagamay, magatuga sang pag-usmod sang ila ikasarang nga magbakal kag sabton ang ila sandigan nga mga kinahanglanon.

Asud-asod nga kalamidad

Ginpalala ang mataas nga presyo sang balaklon sang kahalitan nga tuga sang asud-asod nga kalamidad kag kainutil sang rehimen nga sabton ang kinahanglanon sang pumuluyo sa atubang sini. Ang hampak sang importasyon ang ilabi ginpabaskog sang pagsulod sang siklo sang isa sa pinakamabaskog nga El Niño Southern Oscillation (ENSO) halin sa tunga-tunga sang 2023. Sa una nga katunga sang 2024, naglab-ot ang ikog sang El Niño nga

nagresulta sa grabe nga pagkakaging sa 12 ka prubinsya. Nahalitan sini ang palangabuhian sang masobra 300,000 ka mangunguma sa 17 ka prubinsya kag nag-guba sa pananom nga nagabili sang ₱15.3 bilyon.

Ginsundan ang tig-ilinit sang mabaskog nga pag-ulan, bagyo kag ulan nga dala sang shearline (kung sa diin nagabungguanay ang mainit kag bugnaw nga hangin) nga nagdala naman sang pagbaha kag pagka-usmod sang duta kag nag-anod sa huyang nga mga taytay, karsada kag bilding. Nag-agi sa pungsod ang 18 ka bagyo sadtong 2024. Sundanay nga naghampas ang anom ka bagyo sadtong Oktobre 27, 2024-Nobyembre 18, 2024 nga naghalit sa pagkabutang kag palangabuhian sang 15 milyon katawo sa 17 ka rehiyon, pinakamadamo kag pinakamabaskog sa Bicol, Cagayan Valley, Central Luzon kag Ilocos. Naglab-ot sa ₱21 bilyon ang kahalitan sang anom pa lang ka bagyo nga ini sa agrikultura kag imprastraktura. Sa ti-on sang pag-igo sang mga bagyo, naglab-ot sa 2.9 milyon katawo ang napilitan nga magbak-wit.

Sa banta sang ahensya nga Pag-asa, maka-agum ang pungsod sang 6-8 ka bagyo sa una nga katunga sang 2025, tuga sang pag-abot sang phenomena nga La Niña nga kabahin sang ENSO. Ang La Niña ang dala sang mas bugnaw kumpara sa normal nga temperatura sa kadagatan sa Pacific, kung sa diin nagahimo ang mayorya sang malain nga panahon.

Sini nga Enero lang, madamo nga banwa kag ulumhan sa Eastern Visayas, Bicol kag Davao ang nalunod sa baha tuga sang tayuyon nga ulan kag mabaskog nga hangin. Pareho sang minilyon nga nahalitan, madamo sa ila ang wala sang may nabaton nga bulig halin sa reaksyunaryo nga guberno para makabangon halin sa kalamidad.



₱22.6 B

pondo pangkalamidad ang nagasto sang NDRRMC sadtong 2024 para sa relief and rehabilitation, nga kalabanan (₱12.09 bilyon ukon 53%) ang nagkadto sa DPWH.

Ang DSWD ang nakabaton lang sang ₱8.135 bilyon, samtang ang DA kag ahensya sang pabalay ang nakabaton lang sang ₱500 milyon kag ₱374.970 milyon.

₱129.39 M

kahalitan sa mga ulumhan tuga sang paglupok kag tayuyon nga pag-alburuto sang **Bulkan Kanlaon** sa isla sang Negros. Apektado sini ang 1,431 ka mangunguma.



18,280

pusisyon sa senado, kongreso kag mga lokal nga gubyrno ang bukas para sa mga kandidato sa eleksyon sa Mayo 2025.

₱1 bilyon

kada isa napabalita nga nagasto sang 2 ka kandidato pagkasenador (**Marcos, Villar**) para sa pasayod sadtong Enero-Setyembre 2024 bag-o pa nagsulod ang kampanya sa eleksyon.

₱9.5 B

ginpasulod sang mga kongresista sa pondo para sa AICS sang DSWD, programa pang-ayuda nga kapareho sang **AKAP**, nga nagpasaka sa badyet sini padulong ₱44.744 bilyon. Kasubong sang AKAP, pwede ini nga ipanagtag sa panahon sang eleksyon.

25%

ang gindako sang manggad sang tatlo ka pinakamanggaranon nga Pilipino (**Enrique Razon, Manuel Villar, Ramon Ang**), halin ₱947.3 bilyon sadtong 2023 padulong ₱1.5 trilyon sadtong 2024. Ang tatlo nga ini ang tag-iya sang mga kumpanya sa tubig, kuryente kag enerhiya nga wala pugong nga nagpasaka sang sukot sadtong 2024.

6 MILYON

naimprenta na nga balota nga nagabili sang **₱150 milyon**



ang kinahanglan nga gub-on kag liwat nga iimprenta sang Comelec matapos ginmando sang Korte Suprema nga ibalik ang mga pangalan sang pila ka kandidato nga gindagdag sang ahensya

38,000

sa 89,000 ektarya nga duta nga ginatamnan sang saging pang-eksport sa Mindanao ang wala na nagamit tungod kontaminado ang duta diri sang sakit nga Banana Fusarium Wilt Tropical Race 4 ukon TR4. Indi man mabuhi diri ang iban nga tanom nga pagkaon.

Hungod nga ginpatay, iligal nga pag-aresto kag pagpangastigo, nalista sa Negros Island

Wala untat ang kapintas militar nga ginasabwag sang mga yunit sang Armed Forces of the Philippines (AFP) sa Negros Island. Sa una nga mga semana pa lang sang Enero, may yara na mga kaso sang ekstra-hudisyal nga pagpatay, iligal nga pag-aresto kag iban pa nga mga paglapas sa tawhanon nga kinamatarung ang mga berdugo.

Pagpatay. Hungod nga ginpatay sang mga suldado sang 15th IB ang gin-aresto sini nga Pulang hangaway sang Bagong Hukbong Bayan (BHB)-Southern Negros (Armando Sumayang Jr Command) nga si Rodney Lumanog (Ka Wanny) sadtong Enero 10 sa Sityo Cambogui-ot, Barangay Camindangan, Sipalay City, Negros Occidental. Suno sa yunit sang BHB, buhi nga gindakop si Ka Wanny pagkatapos sang isa ka armado nga inaway sa nasambit nga lugar.

Suno sa mga report, gintortur siya bag-o ginpatay sang mga suldado. May yara sang kapansanan sa tiil si Ka Wanny tungod sa isa ka operasyon sadto pang dekada 1990 kag ginbuslan ini sang *stainless*.

Pag-aresto. sa Sityo Palosais, Barangay Mahalang, gin-aresto sang 94th IB ang isa nga nagahinganlan nga Dado Sanchez sadtong Enero 14. Suno sa mga residente, nagpadulong ang biktima sa iya nga ulingan kag pagkatapos wala na nakabalik. Ginpilit kuno siya sang mga suldado nga mangin giya sa operasyon kombat sang mga ini.

Sa Sityo Nahulop, Barangay San Antonio, gindakop sang mga suldado sila ni Aira Gonzales kag Alfredo Hilado sadtong Enero 15. Ginkastigo naman ang bana ni Gonzales nga si Joseph kag ang upod niya nga tupad balay. Ginapagwa nga nakumpiskar sa ila ang isa ka .45 kalibre nga pistola, mga command-detonated explosive kag mga dokumento. Sa amo man nga adlaw, iligal nga ginkumpiskar sang mga suldado sang 94th IB ang mga selpon sang mga residente sang Sityo Nahulop.

Pagpaandam. Sadtong Enero 3, ginpaandaman sang mga suldado sang 94th IB nga tiruhon ang mag-asawa nga Tasi kag ila mga tupad balay sa Sityo Kamudlis, Barangay Mahalang.

Pagpang-ipit. Ginpasakaan sang kaso nga "terrorism financing" ang duha ka upisyal sang United Methodist Church (UMC) kag isa ka drayber sadtong Disyembre 2024. Ginapasibangdan sang mga pwersa sang estado sila Rev. Julius Neri Camannong kag Rev. Joel Ordaneza sang UMC sa Zamboanga Sibugay, kag drayber nga si Romeo A. Russell nga naghatag sang bulig pinansyal sa mga "terorista."

Ang kaso ang kaangot sa paghatag sang sangtwaro sang mga pastor sa ginapang-ipit nga mga tigpangapin sang tawhanon nga kinamatarung sadtong Enero 2024 sa Zamboanga Sibugay. Gingamit nga basehan sang pulis ang pahayag sang anay aktibista kag subong ahente sang estado nga si Nelson Bautista Jr para kasuhan ang mga biktima. **AB**



Disbar Duterte! Nagpasaka sang reklamo nga disbarment ukon pagkakas isip abogado batuk kay anay Presidente Rodrigo Duterte sa Korte Suprema ang mga biktima sang iya nga kampanya sang pagpatay kag pagpanumpo sadtong Enero 17. Kabahin sa 17 nga nagpasaka sang reklamo sila ni Atty. VJ Topacio, si Liezel Asuncion, asawa sang lider-aktibista nga ginpatay nga si Manny Asuncion kag Llore Pasco, iloy sang duha ka ginpatay sa "gyera kontra droga."

Pagtaas sang matrikula sa UST kag NTC, ginpamatuhan. Nagprotesta ang mga estudyante sang University of Sto. Tomas (UST) sa kampus sini sa Manila sadtong Enero 14 para sawayon ang *tuition and other fees increase* (TOFI) sa unibersidad. Ginpangunahan ang hublag sang pungsodnon-demokratiko nga grupo sa sulod sang UST. Sadtong nagligad nga akademiko nga tuig sa UST, naglab-ot sa 6% ang pagsaka sang matrikula, kag para sa akademiko nga tuig sang 2023-2024 nakapangatubang ang mga estudyante sa pagtaas nga naglab-ot sa 4%-10% depende sa kolehiyo.

Sa National Teachers College sa Manila, masobra 100 estudyante ang nagpirma sa petisyon nga ginpangunahan sang Ayokong Magmahal NTC agud pamatukan ang nagahana nga TOFI. Ginlunsar ang aktibidad kadungan sang "konsultasyon" sadtong Enero 16 angot sa sugyot nga pagtaas sang matrikula sang NTC.

Plano nga taas-plete sa LRT, ginsaway. Ginsugata sang protesta sang mga pamatan-on kag estudyante ang una nga byahe sang LRT-1 Doroteo Jose Station sa Sta. Cruz, Manila sadtong aga sang Enero 15. Ginpamatuhan nila ang plano nga ₱15 maksimum nga taas-plete nga ginaduso sang Light Rail Manila Corporation, ang kumpanya nga nagapadalagan sa serbisyo nga LRT sa Metro Manila. Sadtong Enero 9, nagtambong ang mga tiglawas sang mga progresibo nga organisasyon sa pampubliko nga pagtalakay angot sa taas-plete nga ginlunsar sang Department of Transportation. Ginpabutyag nila diri ang mabaskog nga pagpamatok.

Welga sa Handyman. Nagpasaka sang welga sadtong Enero 6 ang mga mamumugon sang Handyman-True Value-Pet Lovers Empowered Workers Union sa nagapanguna nga depot sang handyman sa Manila Bay Spinning Mills Compound sa Marikina City. Natulod sila nga magbalhin kag tukuron ang piket sa hedkwarters sang Robinsons Retail Holdings, Inc, (RRHI) tag-iya sang Handyman sa Quezon City tungod sa iligal nga pagbungkag sa ila nga welga. Sabat ini sang unyon sa iligal nga kaksanay sa indi magnubo sa 122 ka mamumugon sadtong Nobyembre 2024. Ginkakas sila sang RRHI tungod sa pagtib-ong sang ila nga unyon.

Ikaduha nga paghari ni Trump, pamahog sa mga mamumugon kag pumuluyo sa US kag bilog nga kalibutan

Sadtong udto sang Enero 20 sa Washington DC, nanumpa si Donald Trump isip ika-47 nga president sang US kag pamunuan sang pinakamapang-gyera nga imperyalista sa kalibutan. Liwat siya nga magapungko sa poder matapos ang una niya nga termino sadtong 2016-2020. Magatindog siya nga presidente sa isa ka senado kag kongreso nga dominado sang iya nga mga ka-partido. Nagtambong sa iya inagurasyon ang iya mga tigsuporta nga bilyunaryo kasubong nila Elon Musk, Jeff Bezos kag Mark Zuckerberg, mga tag-iya sang pinakadalagko nga kumpanya sa teknolohiya sa bilog nga kalibutan.

Sa ila nga pamulong-pulong, ginpamatud-an ni Trump ang mga neopasista kag imperyalista nga patakaran nga una na nga ginpalanog nga igapatuman sang iya nga rehimen.

Nagdeklarar siya sang "national emergency" para ilunsar ang "pinakadalagko nga programa sa deportasyon sa maragtas sang Amerika" nga nagapadayon sa kontra-migrante kag rasista nga patakaran sang iya una nga pagpungko. Kabahin sa target nga ideport ni Trump ang ginabulubanta 370,000 Pilipino nga indi dokumentado sa US. Igapadayon man niya ang pagpatukod sang "border wall" ukon pader sa dulunan sang US kag Mexico kag pagpahugot sa mga patakaran sang migrasyon.

Sa iya una nga adlaw, gin-anunsyo niya ang pila sa mga kasuguan ehekutibo nga tuyo niya ipagwa. Kabahin diri ang indi magnubo sa 10 patakaran sa imigrasyon, pagkakas sa pagkilala sang iban nga kasarian sa guberno, paghalin sang US sa kasugtanan kaangot sa pagbag-o sang klima (Paris Climate Accords) kag pagkakas sang regulasyon sa produksyon sang lana kag LNG.

Padayon man nga lagson ni Trump ang mga grupo nga demokratiko kag progresibo kag mangin ang mga institusyon nga nagatib-ong sang mga kinamatarung sibil kag kontra sa militarista nga patakaran sang imperyalistang US.

Sa pihak nga bahin, palaparon ni Trump ang pribilehiyo nga ginahatag sa pa-

borito niya nga mga monopolyo kapitalista sa patag sang teknolohiya, enerhiya, pinansya, real estate kag industriya sang armas. Nagpasalig siya nga "pagamayon ang guberno" para kakson ang mga regulasyon sa mga monopolyo nga kumpanya sa kahalitan sang mga empleyado kag mamumugon nga Amerikano. Kadungan sini, panubun niya ang buhis sa pinakadalagko nga kumpanyang Amerikano, halin 21% padulong 18%. Indi magnubo sa 13 bilyunaryo ang natalana nga mangin kabahin sang iya nga gabinete.

Ilabi nga ginpabaskog ni Trump ang iya agresibo nga patakaran sa angtanay pangluwas. Bag-o makapungko sa poder, paga-angkonon

(pwersahan man ukon baklon) ang Greenland, isa ka isla nga may kaugalingon nga guberno nga may awtonomiya nga nakapaidalom sa Denmark. Nagalaway si Trump sa isla tungod sa balor sang estratehiyang militar sang US. Sa iya nga pamulong-pulong, ginsulit niya ang paandam nga agawon ang Panama Canal, kung sa diin naga-agi ang 40% sang mga baligya nga gina-import kag gina-eksport sang US.

Para mabawi ang pagtiurok sang produksyon sa US, masami ginayawyaw ni Trump sa panahon sang kampanya ang pagpataas sang taripa (10%-20%) sa tanan nga mga produkto nga nagasulod sa US halin sa iban nga pungsod, kabahin ang halin sa Pilipinas. Pinakamataas ang tuyo niya nga ipatuman nga taripa (tubtob 60%) sa mga produkto halin sa China, nga ginakabig sang US isip estratehiko nga karibal.

Kadungan sini, ginalauman nga padayon nga magapatuman si Trump sang mga sangsyon ukon tikang pagpang-ipit sa ekonomya sang Venezuela, Cuba, Iran kag mga pungsod nga nagatib-ong sang ila nga independensya.

Sa idalom ni Trump, wala sang ginalauman nga pagbag-o sa mapanggyera nga pakig-upod sang US sa karibal sini nga mga imperyalistang China kag Russia. Sa likod sang iya mga pahayag nga "kontra-gyera" ang militarista nga panindugan nga "kalinong

paagi sa kusog." Ang ginaduso niya nga untat-lupok sa tunga sang Russia kag Ukraine, ginapabaskog ni Trump ang iya angot sa maki-Tuo kag neopasista nga mga partido kag rehimen sa EU.

Ginaangkon ni
Sundan sa pahina 10



Untat-lupok sa tunga sang Palestine kag Zionistang Israel, ginsugdan na

Matapos ang 460 ka adlaw sang brutal nga pagpamomba kag paglusob sang Zionistang Israel sa Gaza, nadihon ang kasugtanan sa untat-lupok sa Gaza Strip. Gin-anunsyo ini sadtong Enero 16 sang gubyerno sang Qatar, ang nagserbe nga tigpatunga sa estoryahanay, upod ang US kag Egypt. Nagdulot ang una nga hugna sang kasugtanan sadtong Enero 19.

Sa isa ka pahayag, gindayaw sang Hamas ang kapag-on kag kabaganihan sang pumuluyong Palestino nga nagaduso sa Israel nga mag-uyon sa isa ka untat-lupok. Dako nga tiyog ang kasugtanan sa atubang sang pasalig sang Israel nga indi sini pag-untaton ang pagpanglusob tubtob sa "absoluto nga kadalag-an." Ginpaslaw sang mga Palestino ang plano sang Israel nga palayason sila kag paslawon ang ila handum para mangin hilway sa okupasyon kag agresyon sini.

"Ang kasugtanan agud tapuson ang agresyon sa Gaza ang isa ka kadalag-an sang aton pumuluyo, sang aton pagbato, kag sang hilway nga pumuluyo sa kalibutan," suno sa Hamas. Ginpangunahan sang Hamas, upod ang Palestinian Islamic Jihad, Popular Front for the Liberation of Palestine kag iban pa nga grupo sa tanan nga suporta sa ila pagbato sa luwas sang pungsod.

Ginpasidunggan nila ang mga namartir nga Palestinong hangaway sa ila "maisog kag pag-on nga pagbato" sa atubang sang brutalidad sang Israel kag US. Ginkasubo nila ang tanan nga

mga inosente nga bata nga ginpatay kag tanan nga ginpigog kag ginpaantus sang Zionistang estado.

Maga-agi sa tatlo ka hugna ang untat-lupok. Ang una ang may dagway sang gilayon nga pag-untat sang inaway kag paghilway sang Hamas sa uyang sini nga 33 ka Israeli (mga bata, babaye kag tigulang nga edad 50 pasaka) kabaylo sang paghilway sang Israeli sa tubtob 1,000 ka bilanggo nga Palestino. Sa hugna nga ini, paga-obligaron ang Israel nga mag-atras halin sa mga sentro sang populasyon sang Gaza kag hatagan ligwa ang pagsulod sang labaw ka kinahanglanon nga ayuda para sa mga pamilyang Palestino.

Sa ikaduha nga hugna mahitabo ang lubos nga pag-atras sang Israel sa Gaza kag dugang nga baylohanay sang mga bilanggo. Sa ikatatlo nga hugna pagasuguran ang rekonstruksyon sang teritoryo nga ginpulbos sang mga airstrike sang Israel. Tanan nga detalye sa ikaduha kag ikatatlo nga hugna ang ipaidalom sa negosasyon samtang ginapaturan ang una nga hugna sang kasugtanan, nga ginabulubanta magadugay sang tatlo ka semana.

Gintamyaw sang Partido Komunista ng Pilipinas (PKP), kadungan sang mga demokratiko nga organisasyon sa bilog nga kalibutan ang untat-lupok. Amo pa man, sayod ang tanan nga wala sini ginatapos ang Zionista nga okupasyon kag gyerang henosidyo. Sa adlaw mismo sang anunsyo sadtong Enero 16, naglunsar ang Israel sang panibag-o nga serye sang pagpamomba. Sa sulod sang 24 oras, 101 Palestino ang napatay kag 264 ang napilasan sa mga airstrike sini.

"Saluduhan naton ang tanan nga mga hangaway sa ila kaisog kag kahanas sa pagpakig-away para maka-angkon sang mga kadalag-an para sa pumuluyong Palestino sa patag awayan kag negosasyon," suno sa PKP. Ginpakita sang pumuluyong Palestino nga bisan ano man kabaskog ang terorismo sang Israel, wala sini naperdi ang ila diwa nga palaban kag determinasyon nga malabot ang ila ginahandum nga kahalwayan.

Sadtong Enero 17, naglabot na sa 46,788 Palestino ang ginpatay sang Israel sa ginpaarangkada nga gyerang henosidyo sini sa Gaza sa nagligad nga 15 ka bulan. Kabahin diri ang 18,000 ka mga bata. Yara sa 110,265 ang pilason, kung sa diin 25% ang lubha nga napilasan. Masobra 90% sang populasyon sang Gaza ang napalayas sa ila mga puluy-an. AB

Halin sa pahina 9

Trump ang pagkadihon sang kasugtanan nga untat-lupok sa Gaza Strip, nga nagsugod sadtong Enero 19. Wala kasiguraduhan nga magadugay ang kasugtanan nga ini, ilabi pa kilala ang Israel sa kawala-pagtahod sa ano man nga pagsulundan kag kasugtanan. Sa pagkmatuod, adlaw-adlaw sini ginalapas ang untat-lupok nga ginsudlan sini sa Lebanon.

Igapadayon ni Trump ang maka-Zionista kag mapang-gyera nga patakaran sa Middle East. Halin pa sa iya una nga termino, bug-os ang iya su-

porta sa rehimen ni Benjamin Netanyahu kag sa okupasyon sang Zionista nga estado sa mga teritoryo sang Palestine kag lapaw pa. Gindayaw niya ang Abraham Accords kung sa diin ginpabaton kag ginhimo niya nga lehitimo ang pagpakig-angot sang Zionista nga estado sa mga pungsod nga Arabo.

Sigurado nga pabaskugon ni Trump ang pagpanulsol sang US sang gyera sa China. Ang rehimen ni Trump ang nagdihon sadtong 2017 sa estratehiya nga Free and Open Indo-

Pacific, nga nagduso para sa mas malapad nga presensya militar sang US sa Asia, partikular sa South China Sea. Gindeklarar na sang napili niya nga tiglikom sang state department nga "kumprontahon" ni Trump ang China, nagapanguna paagi sa pagpaarmas kag pagpasilabot sini sa Taiwan. Matandaan nga si Trump ang una nga nagpatuman sang Enhanced Defense Cooperation Agreement sa Pilipinas kag nagduso para sa una nga lima ka base militar sang US sa pungsod. AB